

Newspaper	BERITA HARIAN
Date	18 MAY 2016

'Waspada agenda Dr Mahathir'

BH- 18/5/2016

→ Dr Wan Azizah beri peringatan pada pemimpin pembangkang sertai deklarasi bekas PM

Oleh Mohd Azrone Sarabatin,
Norakmah Mat Youb
dan Ahmad Suhael Adnan
bhnews@bh.com.my

► Kuala Lumpur

Presiden PKR, Datuk Seri Dr Wan Azizah Wan Ismail mengingatkan pemimpin pembangkang supaya berwaspada dengan bekas Perdana Menteri, Tun Dr Mahathir Mohamad.

Saranan itu ditujukan kepada kepimpinan pembangkang yang memutuskan untuk menyertai deklarasi dipelopori bekas Perdana

Menteri itu bersama Penasihat DAP, Lim Kit Siang serta beberapa pemimpin pembangkang lain.

"Waspadalah... itu sahaja," katanya ringkas ketika diminta mengulas mengenai surat didakwa ditulis oleh suaminya, Datuk Seri Anwar Ibrahim yang antara lain meminta pemimpin pembangkang yang bekerjasama dengan Dr Mahathir untuk berwaspada dengan politik elit penguasa.

Deklarasi terpesong perjuangan pembangkang

Dalam suratnya, Anwar menyebut deklarasi itu sebagai dokumen Mahathir, cacat, tidak selari dengan pandangan dari sudut reformasi serta hanya menumpukan untuk menjatuhkan Perdana Menteri, Datuk Seri Najib Razak, sekali gus jauh terpesong daripada perjuangan pembangkang.

Kesahihan surat itu disahkan oleh Setiausaha Agung PKR, Rafizi Ramli.

Sebelum ini, Dr Wan Azizah dilaporkan menolak untuk menyertai kempen Selamatkan Malaysia diketuai Dr Mahathir, selain enggan berjumpa bekas Perdana Men-

teri itu yang pernah memecat suaminya daripada jawatan Timbalan Perdana Menteri.

Ketika ditanya sama ada pemimpin PKR perlu menarik diri daripada menyertai deklarasi Mahathir itu, Dr Wan Azizah enggan mengulas dan menyatakan surat Anwar tidak menyebut perkara berkenaan.

Wan Azizah bagaimanapun menyifatkan surat suaminya itu sebagai isu dalaman parti.

"That is an internal matter (Itu hal dalaman)," katanya.

Sementara itu, Ketua Whip PKR di Parlimen, Datuk Johari Abdul, berkata pendirian PKR adalah jelas bahawa parti itu tidak menyokong deklarasi Mahathir.

"Tetapi terpulang kepada mana-mana individu sama ada untuk menyokong deklarasi yang diterajui Dr Mahathir atau tidak," katanya.

Kelmarin, sebuah portal media melaporkan Anwar menulis sepucuk surat kepada pimpinan PKR yang mendakwa deklarasi yang diterajui Dr Mahathir sebagai tidak sempurna dan lari daripada agenda reformasi sebenar.



Waspadalah... itu sahaja. That is an internal matter (Itu hal dalaman)"

Dr Wan Azizah Wan Ismail,
Presiden PKR



Pendirian PKR adalah jelas bahawa parti itu tidak menyokong deklarasi Mahathir"

Johari Abdul,
Ketua Whip PKR di Parlimen